

# Rede ba Rai Timor-Leste

Secretariadu Rede ba Rai, Fundasaun Haburas, Rua Celestino da Silva, Farol, Dili  
Email: [redebarai@gmail.com](mailto:redebarai@gmail.com) Telemovel: +670 730 7800

Dili, 02 Maiu 2012

Membru Parlamentu Nasional  
Iha Uma Fukun Parlamentu

Prezadu Distintu Membru Parlamentu Nasional,

Ami hakerek karta ida ne'e atu lori preokupasaun balun atu bolu ita bot sira nia atensaun antes atu halo diskusaun no aprova fali Lei ba Rai, Lei Expropriasaun no Fundu Financeiru Imobiliariu. Ami espera ne'e hanesan oportunidade ikus ba ita bot sira nia mandatu iha Parlamentu Nasional hodi bele halao dunik ita bot sira nia knar tuir Konstituisaun RDTL 95, Parlamentu Nasional mak reprezenta povu Timor-oan tomak ne'ebe iha kbiit atu halo lei, fiskalizasaun no halo desizaun politika.

Ami hein katak Politika ka Lei ne'ebe mak produz husi Parlamentu Nasional tenke garante dunik povu tomak nia direitu liu-liu povu sira ne'ebe mak kiak no vulneravel.

Ami enkoraja ita bot sira hotu atu bele marka prezensa dunik iha Plenaria wainhira diskute Lei ba Rai 3 ne'e, hodi nune'e halo dunik alterasaun bazeia ba preokupasaun mak haruka husi Prezidente Republika Senhor Jose Ramos Horta katak: Rai ne'ebe iha Titularidade Estadu nian ho ninia pose la prevalece direitus anteriores; La apropriadu data usukapiaun especial iha 31 Dezembru 1998; La klaru ba sistema kompensasaun ba nain uluk ne'ebe la iha titulu, inklue estrangeiru, durante okupasaun Estadu Indonesia hasai titulu 34.965 no husi titulu balun ne'e 30% liu husi dalan korupsialem ne'e titulu ba propriedade privada 100.000-150.000 laos ema Timor-oan; Iha konflitu interese ba rai tamba DNTP mos halao knar iha Komisaun Kadestral; La klaru ba definisaun no protesaun ba direitu komunidadade nian ba propriedade.

Iha tinan 2011- 2012 Governu Timor inklue kompania privada balun viola komunidadade nia direitu hodi halo eviksaun no expropria povu nia rai tamba deit konseptu dezentvolvimentu.

Prezidente Republika Senhor José Ramos Horta veto ba Lei ba Rai 3 ne'e hatudu katak nia hala'o dunik nia knar tuir Konstituisaun RDTL atu garante ema hotu nia direitu, liu-liu tau aas tebes direitu povu kiak no vulneravel sira nian.

Se wainhira Membru Parlamentu Nasional halo alterasaun dunik ba iha Lei ba Rai 3 ne'e tuir preokupasaun mak hatoo husi Prezidente Republika no povu nia preokupasaun sira, ne'e hatudu katak ita bot sira nudar Parlamentu defende dunik direitu povu kiak no vulneravel sira nian, ne'e hatudu katak ukun nain sira hahu kuda ona aliserse evolusaun iha Timor Leste ne'ebe estavel, demokratiku no justu ba iha futuru.

Lei ba Rai 3 ne'e legaliza no haforsa sistema injustisa mak kria tiha ona durante tempu kolonialismu Portugues no invasor Indonesia nian. Wainhira Lei ba Rai ne'e implementa ema mak sei hetan benefisiu bot mak hanesan: Estadu, ema iha sertifikadu Portugues no Indonesia no ema iha osan bot no poder.

Lei ba Rai 3 ne'e sei hamosu konflitu foun iha Timor-Leste, iha futuru povu barak sei lakon ninia valores no prinsipiu sossiu kultural nian ne'ebe mak husik hela husi bei-ala sira tamba rai sei hare liu husi aspetu ekonomia hanesan komoditi (sasan faan no sosa), sei hamosu ema riku no ema kiak rabat rai tamba konsentrasaun rai barak sei iha ema mak iha osan bot tamba iha poder ba selu taxa, povu barak sei lakon rai no hela fatin no sei hamosu favelas (tempat kumuh) iha Timor-Leste.

Too agora asuntu rai kompleksu no sentitivu tebes iha Timor-Leste, ne'e tamba impaktu husi sistema kolonialismu Portugues no okupasaun Indonesia. Lei ba Rai presiza resolve injustisa sira ne'e, agora tempu too ona atu ema Timor-oan rasik kontra sistema injustisa sira ne'ebe akontese iha historia metan iha Timor-Leste iha dekada hirak liu ba.

Hahu fulan Maiu too Jullu Partidu Politiku sira sei halao preparasaun ba Kampane no Eleisaun Parlamentar, tan ne'e tempu la natoon atu diskute klean, hodi aprova no halo implementasaun.

Atu efektivu no efisiente liu Parlamentu Nasional hein too forma Governu foun iha fulan Setembru 2012, hodi dezenvolve Lei ba Rai liu husi konsesu ema Timor-oan tomak nian.

Obrigada wain ba ita bot sira nia atensaun, no ami kontete tebes atu responde ba ita bot sira nia pergunta ka preokupasaun sira.

Iha kotuk ami anexa karta veto ba Lei ba Rai 3 husi Prezidente Republika iha lian portugues.

Sinceramente,

Membru Rede ba Rai